



Inatsisartunut ilaasortaq
Anthon Frederiksen
Partii Naleraq

§ 37 naapertorlugu sanasunngorniarluni ilinniakkamut tunngatillugu apeqqtinut akissut

24-02-2017
Sagsnr. 2016 - 12810
Dok. nr. 4557759

Postboks 1029
3900 Nuuk
Tlf: +299 34 50 00
Fax: +299 32 20 73
Email: iiknn@nanoq.gl
www.nanoq.gl

Asasara Anthon Frederiksen

Qujanaq apeqqtinnut, Naalakkersuisut sinnerlugit uani ataani akissuteqarfigisassannut.

Apeqqt 1: *Danskisut aamma tuluttut sapinngisaqarnissamut piumasaqaataasut saniatigut ilinniarnissamut qinnuteqartunut kalaallisuinnaq oqaasilinnut sanasunngorniartutut ilinniarfimmi akuerineqarnissamut sanasutullu ilinniakkap naammassineqarnissaanut suut piumasaqaataappat?*

Akissut: Qinnuteqartoq assersuutigalugu sanasunngorniarluni ilinniagaqarnissamut piumasaqaatinik naammassinninngitsoq danskimi karakterimik O2/E-mik pisariaqanngilaq ilinniagaqarsinnaanermut mattusimaneqassalluni. Ilinniarfiup ilitersuisuata nalilersimappagu qinnuteqartoq pineqartoq pisariaqartunik tunngaviusunik piumasaqaatinik naammassinnissinnaasoq, ilinniakkamik naammassinninnissamut, pineqartoq kingornagut ilinniartussatut tiguneqarsinnaasarpoq.

Ataasiinnarmik oqaasillit tamakkiusavillutik KTI-mi sanasunngorniarlutik ilinnialersartut ilinniakkaminnik naammassinnittarput. Naak ilinniartitsinermi pappialat atortut annertunerpaartaat eqqarsaatigalugit danskisut allassimasaraluartut sanasunngorniarluni ilinniartitaanermi ilinniartitsisuusut marlunnik oqaaseqartuusarput, sungiusimasarlugulu hold-ini ilinniartitsinerminni ilinniartut ilaasa ataasiinnarmik oqaaseqartuusarneri.

Apeqqt 2: *Ilinniagaqarnissamut qinnuteqartunut ataasiinnarmik (kalaallisut) oqaasilinnut sanasunngorniartutut ilinniarfimmi akuerineqarnissamut sanasutullu ilinniakkap naammassineqarnissaanut, kiisalu piumasaqaatinik allanik naammassinnissimasunut inatsisit suut Inatsisartunit allanngortinneqartariaqartussanut Naalakkersuisunit nalilerneqarpat?*

Akissut: Pisariaqassanngilaq inuussutissarsiutinut ilinniartitaanerni inatsimmik allannguinnissaq, inatsimmi pineqartumi periarfissaareermat sanasussatut ilinniarnermi tiguneqarsinnaaneq, ingerlatsisinnaanerlu naammassilluni kalaallisunnarluunniit oqaaseqartuugaluarluni.

Sanasussatut ilinniartitaanerni ilinniartunngortartunut aporfissaq annerpaaq tassaasanngillat oqaatitsigut atugassarititaasut, kisiannili sanaartornermi inuussutissarsiutini sungiusaammik suliffissat assut annertuumik amigaatigineqarneri. Taamaattumik Naalakkersuisut suliniutit annertunerusumik sammilersimavaat sungiusaammik suliffissanik amerlanerusunik pilersitsisinnaasut, inuusuttagut ilinniakkamik aallartitsisarsinnaaqqullugit naammassinnittarsinnaaqqullugillu.

Apeqquut 3: *Suut tunngavigalugit tuluttut aamma fysik/kemi-mik pisinnaasaqarnissaq sanasunngorniarluni ilinniagaqalernissamut piumasaqaataappat? Assersuutigalugu oqaatigineqarsinnaavoq sanasutut nalinginnaasutut ilinnialernissamut akuerisaanissamut Danmarkimi danskisut aamma matimatikimi O2 piumasaqaataapput.*

Akissut: Ilinniartitaanerni ataasiakkaani ilinniakkamik aallartitsisinnaanermi piumasaqaatit ilinniartit ilinniartitaanernut pilersaarutaani aalajangersarneqartarput, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmit akuerineqartartut. Naalakkersuisut tamatuma saniatigut malittarisassiorsinnaapput piumasaqaatit suut naammassineqarsimassanersut tiguneqarnissamut tunngaviusussatut pillugit. Sanasussatut ilinniartunngortarnermi piumasaqaatit maanna atuuttut Naalakkersuisunit akuerisaapput, KTI-mit inassuteqaatit naapertorlugit.

Kisiannili pissusissamisuunngilaq ilinniartunngornissamut piumasaqaatit nunatsinni namminermit Danmarkimilu taamak assigiinngitsigimmata, minnerunngitsumik isiginiaraanni kalaallit inuusuttut sumiiffinni arlariinni pineqartuni ilinniartunngornissamut qinnuteqarsinnaasut. Taamaattumillu Naalakkersuisut sulissutiginiarpaat O2/E-mi tiguneqartarnermut piumasaqaatit kalaallisut, danskisut aamma matimatikkimi killilerneqarnissaat. Taamaattoq immikkut piumasaqaatigalugu ilinniartitaanerni aalajangersimasumik immikkut piumasaqartoqarsinnaanera.

Apeqquut 4: *Kalaallit nunaanni inuusuttut ilaat ataasiinnarmik (kalaallisut) oqaaseqarput. Suna tungavigalugu ilinniagaqarnissamut qinnuteqartut sanasutut ilinniarnissamut tiguneqassagunik kalaallit AAMMA danskisut pisinnaasaqarnissat pisariaqarpa?*

Akissut: Naak ilinniartitsisut marlunnik oqaaseqartuugaluartut ataasiinnarmillu oqaasilinnik ilinniartitsisinnaagaluartut, taamaattoq suli ilinniutit amerlanersaat danskisuujuupput. Inuussutissarsiutinut ilinniartitaanerit sukkasuummik ineriartorput, taamaattumillu atortussat malinnaasinnaasariaqarlutik. Piffissami

matumani qularnaarneqarsinnaanngilaq ilinniartitsinermi atortussat pitsaanerpaat nutaajunerpaallu kalaallisuujuunissaat. Ingerlaavartumimmi ilinniutinik nutaanik nutserisarnissamut aningaasartuutaannaat annertuallaassapput.

Apeqquut 5: Danskisut aamma kalaallisut pisinnaasaqarnissamik piunasaqaat tassaasoq nalinginnaasumik atuarsinnaanermut allassinnaanermullu qulakkeerinninnerusoq, eqqortumik paasinninneruva?

Akissut: Ilinniakkamut isernissamut piunasaqaatit siullertut pingaarnertullu qularnaarisussaapput inuussutissarsiutinut ilinniartitaanernut qinnuteqartartut ilinniagaqarnissamut piareersimasuunerannik. Ilinniarneqarsinnaasut amerlanerpaat tunngavigisarpaat ilinniartuusussat nalinginnaasumik atuarsinnaallutillu allassinnaanissaat.

Apeqquut 6: Kalaallisuinnaq oqaasillit KTI-mi sanasutut ilinniagaqarnissamut tiguneqartarnissaat kiisalu ilinniakkamik naammassisaqarnissaat qulakkeerniarlugu suliniuteqartoqareepaa?

Akissut: Apeqquummut 1-imut akissut takuuk.

Apeqquut 7: Ataasiinnarmik (kalaallisut) oqaasillit piunasaqaatinik naammassinnissimasut KTI-mi sanasutut ilinniarnissamut tiguneqartarnissaat kiisalu ilinniakkamik naammassisaqarnissaat qulakkeerneqassappat Naalakkersuisut qanoq akeqassanersoq naatsorsuutigaat?

Akissut: Qinnuteqartut tamarmik isernissamut piunasaqaatinik naammassinnittut ilinniarfimmi tiguneqarsinnaapput.

Piffissami matumani ataasiinnarmik oqaasillit KTI-mi sanasussatut ilinniartunngortartut sapaatip akunneri hold-imut taxameteri naapertorlugu aningaasaliivigineqartartuni hold-ini (ingerlatsineq qanoq ittuunersoq apeqqutaatillugu tapiiffigineqartartut taaneqartartuni) ilaapput. Taamaattumik ataasiinnarmik oqaasilinnut immikkoortumik aningaasaliissuteqartarnissamut periarfissaqanngilaq. Tamatumalu saniatigut siumoortumik eqqoriaruminaappoq ataasiinnarmik oqaasillit sanasunngorniarnernut qinnuteqartarumaartut siunissami qassiujuarnaarsut.

Inussiarnersumik inuulluaqqusilluta
Med venlig hilsen


Doris Jakobsen